

利養品第三十三 有二十章

利養品者。勵已防貪見德思議不為穢生。

芭蕉以實死 竹蘆實亦然

駞驢坐妊死 士以貪自喪

如是貪無利 當知從癡生

愚為此害賢 首領分于地

天雨七寶 欲猶無厭 樂少苦多

覺者為賢 雖有天欲 慧捨無貪

樂離恩愛 為佛弟子 遠道順邪

貪養比丘 止有慳意 以供彼姓

勿倚此養 為家捨罪 此非至意

用用何益 愚為愚計 欲慢用增

異哉失利 泥洹不同 諦知是者

比丘佛子 不樂利養 閑居却意

自得不恃 不從他望 望彼比丘

不至正定 夫欲安命 息心自省

不知計數 衣服飲食 夫欲安命

息心自省 取得知足 守行一法

夫欲安命 息心自省 如鼠藏穴

潛隱習教 約利約耳 奉戒思惟

為慧所稱 清吉勿怠 如有三明

解脫無漏 寡智鮮識 無所憶念

其於食飲 從人得利 而有惡法

從供養嫉 多結怨利 強服法衣

但望飲食 不奉佛教 當知是過

養為大畏 寡取無憂 比丘釋心

非食命不濟 孰能不揣食

夫立食為先 知是不宜嫉

嫉先創己 然後創人 擊人得擊

是不得除 寧噉燒石 吞飲洋銅

不以無戒 食人信施